

四庫全書

史部

欽定四庫全書

金史卷十五

元中書右丞相總裁托克托等修

本紀第十五

宣宗中

興定元年春正月己卯朔宋遣使來賀癸未宋使朝辭
上謂宰臣曰聞息州南境有盜此乃彼界饑民沿淮為
亂爾宋人何故攻我高琪請伐之以廣疆土上曰朕意

不然但能守祖宗所付足矣安事外討乙未詔中都西
京北京等路策論進士及武舉人權試于南京東平博
索上京等四路丙申東平行省言調兵以來吏卒因勞
進爵多至五品例獲封贈及民年七十並該覃恩若人
往自陳公私俱費請令本路為製誥勅類赴朝廷以求
印署使受命者量輸諸物而給之人力不勞兵食少濟
從之皇子平章政事濮王守純授世襲東平府路三屯
明安尚書左丞胥鼎進平章政事封莘國公癸卯議減

庶官冗員乙巳大元兵攻觀州二月戊申朔初用貞祐
通寶凡一貫當貞祐寶券千貫己酉命樞密院汰罷軟
軍士諭尚書省用官馬給驛傳以紓民力庚戌皇后生
辰詔百官免賀仍諭旨曰時方多難將來長春節亦免
賀禮辛亥以崇進元帥右都監完顏薩布簽樞密院事
癸丑罷招賢所乙卯皇孫生宣徽請稱賀詔無用樂己
未大元兵徇忻代詔定州縣官雖積階至三品坐乏軍
儲者聽行部決遣壬戌尚書省以軍儲不繼請罷州府

學生廩給上曰自古文武並用向在中都設學養士猶未嘗廢況今日乎其令仍舊給之丙子議置莊獻太子廟三月戊寅勅事關刑名當面議之勿聽轉奏以絳陽軍節度使李革知平陽府兼河東南路兵馬都總管權參知政事行尚書省壬午定民間收潰軍亡馬之法及以馬送官酬直之格乙酉上宮中見蝗遣官分道督捕仍戒其勿以苛暴擾民庚寅長春節宋遣使來賀辛卯詔罷平陽河中元帥乙未先徵山東兵接應苗道潤共

復中都而石海據真定叛慮為所梗乃集鈕祜祿貞郭
文振武仙所部精銳與東平軍為犄角之勢圖之己亥
大元兵攻新城庚子攻霸州甲辰威州刺史武仙率兵
斬石海及其黨二百餘人降葛仲趙林張立等軍盡獲
海僭擬之物尋進仙權知真定府事夏四月丁未朔以
宋歲幣不至命烏庫哩慶壽完顏薩布等經略南邊戊
申孟州經略司萬戶宋子玉率兵叛斬關而出經畧使
蘇爾坦等追敗之庚戌花帽軍作亂于滕州詔山東行

省討之南陽五朵山盜發衆至千餘人節度副使伊喇
洋格出討遇之方城招之不從乃進擊之殺其衆殆盡
癸丑以安化軍節度使完顏窩權元帥左都監行元帥
府事督經畧使苗道潤進復都城且令和輯河間招撫
使伊喇特爾格等軍特爾格與道潤不協互言有異志
故命重臣鎮之戊午單州雨雹傷稼詔遣官勸諭農民
改蒔秋田官給其種平定州賊閻德用之黨閻顯殺德
用以其衆降己未以權參知政事遼東路行省完顏阿

里巴斯為參知政事行尚書省元帥府于博索路以權
遼東路宣撫使富察烏錦權參知政事行尚書省元帥
府于上京庚申李革請罷義軍總領使副以畀州縣尚
書省以秋防在通改法非便姑如舊制州縣各司察之
甲子元帥完顏薩布破宋兵于信陽使來奏捷乙丑濟
南泰安滕兗等州賊並起侯摯遣棣州防禦使完顏霆
討平之降其壯士二萬人老幼五萬人完顏薩布復奏
敗宋軍于隴山等處俘馘甚衆戊辰太白晝見于井卒

未權孟州經畧使蘇爾坦追賊宋子玉至輝州境其黨
邢福殺子玉以衆來歸壬申以萬努叛逆未殄詔諭遼
東諸將完顏薩布軍渡淮破光州兩關獲軍實分給將
士五月戊寅陝西行省破夏人于大北岔是日捷至丁
亥民范汝濟上書陳利害上以示宰臣曰卑賤小人猶
能盡言如此有可采者即行之己丑賊宋子玉餘黨家
屬悉放歸農尚書右丞富察伊埒圖棄官擅赴京師降
知河南府事行樞密院兼行六部事壬辰延州原武縣

雨雹傷稼詔官貸民種改蒔癸巳宋人攻潁州焚掠而去戊戌行樞密院兵敗宋人於泥河灣又敗之樊城縣山東行帥府事蒙古綱擅械轉運使李秉鈞法當決秉鈞返詈綱應論贖詔兩釋之宋人取漣水縣癸卯蘭州水軍千戶李平等苦提控富察雅爾堅貪暴殺之構夏人以叛脅其徒張宸俱行宸以計盡獲之陝西行省便宜遷宸官四階授同知蘭州事頒賞有差以其事上聞甲辰大元兵下沔城縣軍官任福死之丙午定河北求

仕官渡河之法曾經總兵者白樞密院餘驗據聽渡行
樞密院事烏庫哩慶壽南代還奏不以實詔鞠之六月
己酉苗道潤表歸國人李琛復以衆叛琛亦表道潤異
謀詔山東行省察之修潼關遣中使持詔及暑藥勞夫
匠權參知政事張行信進參知政事庚戌詔捕治遼東
受偽署官家屬得按察使高禮妻子皆戮之壬子制鄜
坊丹州四品以下州縣官視環慶例以二十月終更甲
寅招撫使惟宏言彰德府守臣擅徙民山砦避兵上曰

難保之城守之何益徒傷我民爾勿治乙卯顯宗忌日
謁奠于啓慶官丙辰詔樞密院遣經歷官分諭行院嚴
兵利器以守衝要仍禁飲宴違以軍律論家人合土寇
攻東海境戊午以宋遣兵數犯境及歲幣不至詔諭沿
邊罪宋己未詔凡上書人其言已采用者上其姓名辛
酉以進士朱蓋草澤人李維嶽論議可取詔給八貫石
俸乙丑設潼關使副及三門集津提舉官尚書左丞相
兼都元帥布薩端堯輟朝置南京流泉務遼東行省遣

使來上正月中敗契丹之捷秋七月丙子朔日有食之
辛巳宋人圍泗州壬午圍靈璧縣癸未陳州振威軍萬
戶馬寬逐其刺史李策據城叛遣使招之乃降已而復
謀變州吏擒戮之夷其族甲申詔諭遼東諸路乙酉宋
人襲破東海縣丙申置提舉倉場使副癸卯太社壇產
嘉禾一莖十有五穗甲辰夏人犯黃鶴堡官軍敗之乙
巳初置集賢院知院事同知院事等官宋人及土寇攻
海州經畧使擊破其衆夏人圍羊狼寨帥府發諸鎮兵

擊走之八月戊申陝西行省報木波賊犯洮州敗績遁去木星晝見于昴六十有七日乃伏己酉海州經畧司表官軍與宋人戰石湫南戰漣水縣戰中土橋宋兵敗績壬子削御史大夫永錫官爵有司論失律當斬上以近族特貫其死癸丑宋人攻確山縣為官軍所敗詔諭國內軍士使知宋人渝盟之故仍命大臣議其事乙卯集賢院諮議官朱蓋上書陳禦敵三策壬戌海州經畧使阿布哈努色爾敗宋人于其境提控李元與宋人戰

屢捷多所俘獲徙欄通渡經畧司於黃陵岡乙丑制增
定擒捕逃軍賞格及居停人罪丙寅左司諫布薩毅夫
乞更開封府號賜美名以尉氏縣為刺郡睢州為防禦
使與鄭延二州左右前後輔京師上曰山陵在中都朕
豈樂久居此乎遂止癸酉太祖忌日謁奠于啓慶宮甲
戌元帥右都監承裔遣部將納喇吉遜等合巴鄂特族
都管尼瑪哈以兵掩襲果爾餘族諸番帳屢破之斬馘
士卒擒其首領俘獲人畜甚多是日捷至九月丁丑更

定監察御史失察法以元帥左監軍必喇阿魯岱權參
知政事行省于益都戊寅夏人犯綏德之克戎寨都統
羅世暉逆擊却之己卯蔡州帥府偵宋人將窺息州以
輕兵誘其進別以銳師邀擊之虜其將沈俊壬午以改
元興定赦國內甲申罷規運所設行六部辛卯大元兵
徇隰州及汾西縣癸巳攻沁州遼東行省完顏阿里巴
斯為叛人伯特呼圖所殺月犯東井西扇北第二星乙
未大元兵攻太原顛箕掌寨丁酉薄太原城攻交城清

源癸卯立沿河冰牆鹿角冬十月丁未以霖雨詔寬農民輸稅之限庚戌以將有事于宋詔帥臣整厲師徒辛亥遣官括市民馬紅賞格以示勸甲寅命高汝礪張行簡同修章宗實錄息州帥府獻破宋人于中渡之捷乙卯大元兵徇中山府及新樂縣丙辰丹州進嘉禾異畝同穎辛酉制定州府司縣官失覺姦細罪壬戌右司諫兼侍御史許古上疏請先遣使與宋議和乙丑大元兵下磁州丙寅定職官不求任及規避不赴任法高汝礪

上疏言和議先發於我恐自示弱非便戊辰上命許古
草通宋議和牒既進以示宰臣宰臣以其言有祈哀之
意徒示微弱無足取者議遂寢辛未罷流泉務大元兵
收鄒平長山及淄州壬申改郕國號為管避上嫌名高
汝礪表致仕不允十一月壬午從宜伊喇邁努言賊魚
張二等若悉誅之屢詔免罪恐乖恩信且其親屬淪落
宋境近在均州或相構亂乞貸其死徙之歸德睢陳鈞
許間為便詔許之癸未月暈木火二星木在胃火在昴

丙戌太白晝見遣翰林侍講學士楊雲翼崇之大元兵
收濱棣博三州己丑下淄州庚寅下沂州甲午河西嘉
納克楚納克等族千餘戶來歸丁酉詔唐鄧蔡州行元
帥府舉兵伐宋戊戌大元兵攻太原府庚子上謂宰臣
曰朕聞百姓流亡逋賦皆配見戶人何以堪又添徵軍
須錢太多亡者詎肯復業其并議除之宰臣論命行部
官閱實蠲貸已代納者給以恩例或除他役或減本戶
雜征四之一上曰朕於此事未嘗去懷其亟行之十二

月甲辰朔大元兵攻潞州都統馬甫死之戊申即墨移
風砮於大舶中得日本國太宰府民七十二人因羅遇
風飄至中國有司覆驗無他詔給以糧俾還本國庚戌
元帥左監軍富察烏錦進右副元帥權參知政事充遼
東行省是日大元兵平益都府辛亥陝西行省胥鼎諫
伐宋不報甲寅海州經畧使報提控韓壁敗宋人于鹽
倉己未大元兵復攻沂州官民棄城遁辛酉下密州節
度使完顏窩死之壬戌候摯兼三司使庚午免逃戶復

業耆差賦

卷十五

二年春正月乙亥詔議賑恤辛巳勅南征將帥所至毋
縱殺掠壬午宋人攻淮北唐州元帥府敗之獲統領季
雄韜陳臯以歸癸未近侍局副使額爾克遣使報南師
之捷乙酉陝西行省獲歸國人言大元兵圍夏王城李
遵頊命其子居守而出走西涼詔諭諸帥府明斥候嚴
守備戊子唐鄧元帥完顏薩布報連破宋人之捷宋人
攻泗州又戰却之二月癸卯宋人侵青口行樞密院遣

兵敗之甲辰免中京嵩汝等州逋租諭胥鼎克宋散關
可保則保不可保則焚毀而還定奴婢救主法丙午額
爾克敗宋人于防山赫舍哩和勒端亦奏上光州信陽
之捷庚戌海州經略敗宋兵于朐山表請繼其軍儲詔
東平帥府發兵護送資糧以應之許州長社縣何冕等
謀反伏誅辛亥張行信出為彰化軍節度使兼涇州管
內觀察使壬子御史以北兵退請汰各處行樞密院元
帥府冗官尚書以為非便上從尚書言仍舊制完顏薩

布報棗陽之捷癸丑完顏阿林報皂郊堡之捷丁巳壽
州行樞密院破宋人高柳橋水砦夷其砦而還壬戌額
爾克遣兵拔宋柵碁盤嶺又破之於裴家莊寒山嶺龍
門關等處得粟二千餘石乙丑諭樞密曰中京商號諸
州軍人願耕屯田比括地授之聞徐宿軍獨不願受意
謂予田必絕其廩給也朕肯爾邪其以朕意曉之丙寅
諭尚書省曰聞中都納粟官多為吏部繳駁殊不知方
闕乏時利害為如何又立功戰陣人必責保官若輩皆

義軍白丁豈識職官苟文牒可信即當與之至若在成都時規運薪炭入城者朕嘗植恩授以官此豈容偽而間亦為所沮格其悉諭之勿復若是赫舍哩約赫德破宋人于盱眙軍上俘獲之數已已以候摯行省河北兼行三司安撫司事三月庚辰尚書集文資官雜議進士之選詔依泰和例行之癸未額爾克敗宋人于光化軍甲申長春節戊子諭宰臣曰舊制廷試進士晡後出宮近欲復舊恐能文而思遲者不得盡其才其今日沒乃出

以御史中丞巴古拉為參知政事陝西行六部尚書楊
貞削五官累杖一百七十解職額爾克表言官軍自桐
栢入宋境所向克捷癸巳宋人爭皂郊堡擊官軍軍潰
主將完顏阿林戰沒丙申更定京城捕告強盜官賞制
辛丑上京行省富察烏錦表左監軍格綑額誣防州宣
撫副使赫舍哩阿敦將叛而殺之事下尚書省宰臣以
為阿敦之死徐議卹典格綑額亦姑牢籠使之上勉從
其言夏四月壬寅朔富察烏錦表遼東便宜阿里巴斯

貸糧高麗不應輒以兵掠其境上命烏錦遣人以詔往諭高麗使知興兵非上國意乙巳詔河南路行總管府節鎮以上官充宣差捕盜使以防禦刺史以上長貳官及世襲明安之才武者為之副又命濮王府尉完顏摩囉歡為宣差提控以巡督之是日曲赦遼東等路以戶部尚書瓜爾佳必喇為翰林學士承旨權參知政事行省遼東丁未承裔敗宋人于皂郊堡庚戌御史劾集賢院諮議官李維嶽本中山府無極縣進士趙孝選家奴

乞正其事上曰國家用人奚擇貴賤命以官銀五十兩贖放為良任使仍舊壬子遣侍御史完顏蘇特近侍局副使額爾克赴遼東察訪叛賊萬努事體行省侯摯督兵復密州提控朱琛復高密縣癸丑完顏蘇特請宣諭高麗復開互市從之乙卯特賜武舉溫特赫皦珠以下一百四十人及第丁巳陝西行省兵破宋雞公山取和州成州至河池縣黑谷關守者皆遁前後獲糧九萬斛錢數千萬軍實不可勝計戊午紅襖賊犯徐邳行樞密

院兵大破之己未阿里巴斯自潼關之敗失其所在變姓名匿居柘城為御史覺察繫其家屬將窮治之乃遣子上書詣吏待罪臺臣力請誅之以懲不忠上卒赦其罪諭以自效癸亥遣重臣審理京師冤獄丁卯河南諸郡蝗臨洮路報敗宋人之捷東平行省敗黑旗賊拔膠西縣渠賊李全來援併破之戊辰河北行省敗紅襖賊進至密州降偽將校數十人士卒七百人悉復其業五月辛未朔鳳翔元帥完顏閭山破宋人部落塢香廬堡

諸屯甲戌招撫副使洪果阿魯岱襲破李全于莒州及日照縣之南三道擊之追奔四十里丙子夏人自葭州入鄜延元帥承立遣兵敗之馬吉峯是日捷至詔遣官督捕河南諸路蝗辛巳策論詞賦經義進士及武舉人入見賜誥命章服萊州民曲貴殺節度經畧使內族專努自稱元帥構宋人據城叛山東招撫司遣提控王庭玉招撫副使洪果阿魯岱等討平之斬偽統制白珍及牙校數十人生擒貴及偽節度使呂忠等十餘人誅之

乃命庭玉保萊朱琛保密阿魯岱保寧海以安輯其民
丙戌陝西行省言四月中鞏州行元帥承裔遣提控烏
庫哩長壽納喇吉遜分道伐宋長壽出鹽川鎮吉遜出
鐵城堡皆克捷而還辛卯壽州行樞密院南城軍攻辛
城鎮一軍趣史河與宋人戰勝之壬辰河北行省復黃
縣乙未第鳳翔秦鞏三道南征將士功各遷其官丙申
增隨朝官及諸承應人俸戊戌陝西行省連報承裔等
入宋境之捷己亥大元兵徇錦州元帥劉仲亨死之庚

子陝州羣狼傷百餘人立賞募人捕殺六月甲辰樞密院言諸道表稱大元集兵應州飛狐將分道南下觀其意不在河北而在陝西河東各路義士土兵蕃漢弓箭手宜於農隙教閱以備緩急東平單州衝要豫徙其農民糧畜置可守之城修近城水砦因以為固潼谷遠連商虢宜令兩帥府選官按視阨塞又言賈瑤等刺殺苗道潤乞治瑤等專殺之罪餘州郡各以正職授頭目使分治一方上諭之曰道潤之衆亟收集之瑤等是非未

明姑置勿問諸頭目各制一方利害至重更深處之石
州賊馮天羽衆數十據臨泉縣為亂帥府命將討捕之
為賊所敗旁郡縣將謀應之州刺史赫舍哩公順赴以
兵天羽等數十人迎降公順殺之餘賊走保積翠山遣
將王九思攻之不下詔國史院編修官馬季良持誥勅
金幣往招之比至九思先破柵殺賊二十人餘復走險
已而其黨安國用等詣季良降者五千餘人就署國用
同知孟州防禦使事以次遷擢有差分其衆于絳霍間

丁未以參知政事巴古拉權左副元帥與平章政事胥鼎協力防秋己酉苗道潤所部軍請隸潞州元帥府詔河北行省審處之壬子紅襖賊犯沂州官軍敗之追至白里港都提控齊信沒於陣有司議贈卹丙辰遣監察御史鈕祜祿蘇卜實往河中等郡同守土官商度可保城池丁巳上以久旱諭宰臣治京獄寃因及京城小民中納石炭既給其價御史劾以過請官錢並繫之獄有論至極刑者欲悉從寬宥何如高琪對不然遂止壬戌

御史言戶部員外郎臧伯昇供億息州偶遇官軍戰勝亦冒遷一官乞論其罪上曰軍前如此者何止伯昇今遽見罪餘皆不安且詰所從來勢連及帥府多故之秋豈為一官遂忘大計但令釐正之癸亥遣高汝礪圖克坦思忠禱雨秋七月庚午朔日有食之辛未詔賞南伐將士有差夏人犯龕谷提控瓜爾佳瑞及其副趙防敗之甲戌以旱災詔中外已卯遣官望祀嶽鎮海瀆于北郊享太廟祭太社太稷祭九宮貴神于東郊以禱雨遣

太子太保阿布哈德剛禮部尚書楊雲翼分道審理冤獄癸未大雨太子親王百官表請御正殿復常膳庚寅擇明幹官提控銓選無違失者與升擢令譯史不任事者驗已歷俸月放滿別選能者甲午夏人復來侵瓜爾佳瑞大破之用點檢承立言遣官詣諸道選寄居守闕丁憂官及親軍入仕才堪總兵者得一百六人付樞密任使八月庚子朔江北行省以苗道潤軍隸涿州刺史李奇嚕副以張甫張柔戊申勅親軍百戶以下授職待

關者給本俸仍充役俟當赴任遣之己酉詔河北行省
完顏霆進軍援山東招撫使田琢自今將士立功聽琢
先賞以聞大元遣穆呼哩等帥步騎數萬自太和嶺徇
河東乙卯大元兵收代州辛酉棣州提控赫舍哩綽哈
討賊張聚大破其衆復濱棣二州姦人李宜伏誅復禁
北歸民渡河戊辰大元兵收隰州九月乙亥下太原府
元帥左監軍兼知樞府事烏庫哩德升死之丙戌諭皇
太子曰軍務之速動關機會悉從中覆則或稽緩自今

當亟行者先行後聞以戶部尚書納哈塔富拉塔為元帥右監軍行帥府事于潞州戊子置秦關等處九守禦使命完顏芬徹等分戍諸阨議遷海州侯摯言不便止大元兵徇汾州節度使烏雅恩徹亨死之庚寅李全破密州執招撫副使洪果阿魯岱同知節度使瓜爾佳肆嘉努辛卯大元兵下孝義縣乙未設隨處行六部官以京府節鎮長官充尚書次侍郎郎中員外郎防刺長官侍郎次郎中員外郎主事勾當官聽所屬任使州府官

並充勸農使防刺長官及京府節鎮同知以下充副使
丙申李全破壽光縣冬十月甲辰李全破鄒平縣戊申
破臨朐縣己酉大元兵徇絳潞壬子攻平陽提控郭用
死之癸丑下平陽知府事權參知政事行尚書省李革
及蘇爾坦死之甲寅權平定州刺史范鐸以棄城誅詔
諸部錄囚官凡坐軍期者皆奏獻山東路轉運副使兼
同知沂州防禦使程戩及邳州副提控王汝霖等通宋
人為變伏誅宋人攻漣水縣提控劉瑛敗之丁巳大元

兵攻澤州戊午尚書省言獲姦細叛亡率多僧道詔沿
邊諸州惟本處受度聽依舊居止來自河北山東遣入
內郡讖其出入已未李全據安邱提控王政屯昌樂俟
王庭玉兵同進討宣差太府少監伯特玩擅率政兵攻
全為全所敗提控王顯死焉田琢上言乞正玩罪癸亥
月犯軒轅左角之少民星甲子詔河東北路忻代寧化
東勝諸州並受嵐州帥府節制十一月庚午大赦庚辰
御登賢門召致政舊臣賜食訪時政得失辛巳行元帥

府赫舍哩和勒端權簽樞密院事行院于徐州權右都
監額爾克行元帥府事于息州甲申河東南路隰吉等
州聽絳州元帥府節制大元兵收潞州元帥右監軍納
哈塔富拉塔參議官修起居注王良臣死之寵谷提控
瓜爾佳瑞敗夏人于質孤堡河北行省報海州之捷壬
辰定經兵州縣職官子孫非本貫理蔭及過期不蔭等
格丙申大元兵下太原之韓村砦定京師失火法十二
月己亥朔以御史中丞完顏伯嘉權參知政事元帥左

監軍行河中府尚書省元帥府控制河東南北路便宜
從事升絳州為晉安府總管河東南路兵降平陽為散
府辛丑簽樞密院事富察伊埒圖伏誅壬寅前山東西
路轉運使致仕伊喇富森上章言時事癸卯詔大理卿
溫特赫達權同簽樞密院事行院許州甲辰以誅伊埒
圖詔中外乙巳命圖克坦思忠祈雪已而大雪甲寅以
開封府治中呂子羽等使宋講和紅襖賊攻彭城之胡
村寨徐州兵敗之乙卯禮部侍郎穆延呼喇勒為汾陽

軍節度使權元帥右監軍嵐州元帥瓜爾佳實倫完復
河東丁巳籍瀕河埽兵癸亥尚書省言樞密掌天下兵
皇太子撫軍而諸道又設行院其有功及失律者須白
院啓東宮至於奏可然後誅賞有司但奏行而已自今
軍中號令關賞罰者皆明注詔旨教令毋容軍司售其
姦欺上從之以樞密副使駙馬都尉布薩安貞為左副
元帥權參知政事行尚書省元帥府事戊宋甲子上諭
旨有司京師西食死於祁寒朕甚憫之給以後苑竹木

令居獲燠所

三年春正月庚午呂子羽至淮宋人不納而還詔伐宋
丙子稅民種地畝議行均輸戊寅勅和市邊城軍需無
至配民定鎮戍征行軍官減資歷月日格壬午大雪上
聞東掖有撒瓦聲問左右知為丁未葺器物庫廡舍上
惻然諭主者曰雪寒役人不休可乎姑止之丙戌赫舍
哩約赫德上壕州香山村之捷丁亥諭宣徽皇后生日
免百官賀壬辰以大元兵已定太原河北事勢非復向

日集百官議備禦長久之計代宋捷至上謂侍臣曰此事豈得已哉近日遣使實欲講和彼既不從安得不用兵也免單丁民戶月輸軍需錢甲午有司請立價以買南征軍士所獲馬上恐失衆心因至敗事不聽乙未勅尚書省自今六部稟議常事但可再送不得趣召辯正餘應入法寺定斷而再送猶未當者具以聞下吏治之宰相執政以下皆不得召部寺官部寺官亦不得詣省犯者論違制丁酉鄧州元帥府提控羅索有罪減死削

爵二月庚子上與太子謀南征帥不得其人歎曰天下之廣緩急無可使者朕安得不憂赫舍哩約赫德敗宋人于滁甲辰胥鼎言軍中誅賞近制須聞朝廷賞由中出示恩有歸可部分失律主將不得即治其罪不可詔尚書樞密雜議宰臣請城守野戰將校有罪從七品以下許便宜決罰餘悉奏裁上曰七品以下財令治之將權太輕或至誤事自今四品以下聽決乙巳攻宋光山縣俘其統制蔡從定等光州以兵來援復敗之丙午上

謂宰臣江淮之人號稱選悞然官軍攻蔓菁峒其衆困甚脅之使降無一肯從者我家河朔州郡一遇北警往往出降此何理也丁未勅凡立功將士有居喪者特起復遷授戊申拔宋小江寨殺其統制王大蓬己酉取宋武休關庚戌元帥右都監承立以綏德保安之境各獲夏人統軍司文移來上其辭雖涉不遜而皆有保境息民之言詔尚書省議之宰臣言鎮戎靈平等鎮近耗夏人數犯疆場此文正緩我爾宜嚴備禦以破姦計上然

其言又曰頃近侍還自陝西謂博索已得鳳州如得武
休關將遂取蜀朕意殊不然假令得之亦何可守此舉
蓋為宋人渝盟初豈貪其土地邪朕重惜生靈惟和議
早成為佳爾高汝礪乞致仕優詔不允甲寅詔陝西行
省從七品以下官許注擬有罪許決罰丁憂待闋隨宜
任使軍官徒以上罪及軍事怠慢者巡按御史治之已
未行省安貞入宋境破梁縣等軍擒統制李申之右副
元帥完顏薩布左都監約赫德白石關平山砦之捷俱

至三月丁卯朔陝西兵破宋虎頭關取興元洋州捷至上大悅庚午破宋人于七口倉甲戌高麗先請朝貢因遣使撫諭之使還表言道路不通俟平定後議通款命行省姑示羈縻勿絕其好戊寅蔡州行元帥府右都監完顏哈達破宋人于海林關擒統制張時已卯長春節免朝賀提控鄂屯沃哩布敗宋人于上津縣軍還至濠州宋人來拒約赫德擊走之乙酉河南路節鎮以上立軍器庫設使副各一員防刺郡設都監同監各一員完

顏哈達敗宋人于馬嶺堡丙戌行省安貞破宋人于石
垌山己丑追賜皇后父太尉汴國公彥昌姓溫都庚寅
攻宋麻城縣拔之獲其令張侗等辛卯行省安貞破宋
兵于塗山壬辰薩布敗宋兵于老口鎮又敗宋人于石
鵲崖甲午錄用罪廢官副元帥富察阿里巴斯御史大
夫永錫等七十人詔太原等路州縣闕正授官令民推
其所愛為長從行省量與職任及運解鹽入陝西以濟
調度命胥鼎兼領其事閏三月丙申朔申明屠宰牛罪

律以雄霸以東付權中都經略李奇嚕易州以西付權
中都西路經畧靖安民治之除遙授金安軍節度使完
顏和尚故行軍副提控瓜爾佳烏登名庚子皇子平章
政事濮王守純進封英王壬寅叛賊王公喜構宋人取
沂州甲辰沂國公主薨輟朝丙午給空名宣勅及金銀
符付嵐州帥瓜爾佳實倫便宜遷注以招脅從丁未諭
樞密院議晉安東平河中諸郡備兵之策庚戌行省左
副元帥布薩安貞至自軍前入見于仁安殿辛亥少監

鈕祜祿蘇卜實言利害七事甲寅以南伐師還罷南邊
州郡籍民為兵者戊午夏人破葭州之通秦砦刺史赫
舍哩王嘉努戰沒壬戌治書侍御史富勒呼上書請選
太子師傅甲子胥鼎等各遷官賞南伐之功夏四月丙
寅朔裕宿等州置元帥府選陝西步騎精銳六千人實
京兆戊辰選精銳六萬分屯平涼涇邠乾耀等州庚午
以秦州防禦使鈕祜祿古爾錦行元帥府于平涼罷募
民運解鹽築京師裏城命侯摯董役高琪總之甲戌以

知臨洮府事實嘉喀齊喀為元帥左都監行元帥府事
于鞏州壬午遣近侍四人巡視築城丁夫時其飲食聽
其更休督吏慘酷悉禁止之癸未陝西黑風晝起有聲
如雷地大震甲申詔河北州縣官止令土著推其所愛
者充朝廷已授者別議任使乙酉夏人據通秦寨提控
納哈塔邁珠敗之己丑林州都統霍成以疑貳誣殺降
人論罪當死元帥惟良不欲以殺敵人誅邊將請寬其
罰仍請立護送降民賣格以杜後患上為之赦成而命

有司班賞格焉護送十人以上至者遷一官不及者每名賞錢二百緡五十人以上兩官百人以上兩官雜班任使庚寅以時暑詔朝臣四日一奏事高汝礪請備防秋之糧宜及年豐於河南州郡驗直立式募民入粟上與議定其法而行之同提舉權貨司王三錫請權油歲可入銀數萬兩高琪主之衆以為不便遂止辛卯夏人犯通秦砦元帥完顏哈達出兵安塞堡以擣其巢至隆州夏人逆戰官軍擊之衆潰進薄城俄陷其西南隅會

日暮還壬辰以同知平陽府事胡天作充便宜招撫使
五月乙未朔鳳翔元帥府遣兵敗宋人于黃牛等堡壬
子太白晝見于參六月甲子朔時暑給修城夫病者藥
餌遣諭元帥哈達曰以卿幹局故有唐鄧之委或有侵
軼戰退不宜遠追第固吾圍以驃騎上將軍河南路統
軍使實嘉紐勒歡為元帥右都監行平涼元帥府事詔
赴遼東等處行省給銀符及空名宣勅聽便宜處置壬
申制沿河戍兵逃亡罪並同征行軍人例詔御史中丞

完顏伯嘉行樞密院于許州甲戌定防秋將校擊鉢飲燕之罰李全寇日照博興赫舍哩萬努敗之寇即墨完顏僧壽又敗之復萊州戊寅詔陝西簽軍如河南例曲赦河東南北路丁亥命防禦使圖克坦福定等帥所部軍與沂州民老幼盡徙于邳戊子遼州總領提控唐古果勒帥師復太原府平涼等處地震詔右司諫郭著撫諭其軍民秋七月丁酉籍邳海等州義軍及脅從歸國而充軍者人給地三十畝有力者五十畝仍蠲差稅日

支糧二升號決勝軍戊戌上進樞密臣僚諭之曰裏城
久未畢功尚書欲增調民朕慮妨農況糧儲不繼將若
之何盍改圖之樞臣言是役之興實為大計今功已過
半偶值霖潦成功差遲尚書議增丁夫勢必驗口不令
妨業比及防秋當告成矣上曰卿等善為計無貽朕憂
庚子以地震曲赦陝西路甲辰置東西南三路行三司
乙卯曲赦山東西路丁巳以地震遣圖克坦思忠祭地
祇于上清宮八月丙寅補闕許古等削官解職丁卯木

星犯輿鬼東南星戊辰遣禮部尚書楊雲翼祭社稷翰林侍讀學士趙秉文祭后土于河中府西京行三司李復亨言汝鄧冶鐵河南北食鹽之利木星晝見于柳百有九日乃減壬申上勅臺臣朕處分尚書事或至數日不奉行及再問則巧飾次第以對大臣容有遺忘左右司玩弛臺臣當糾今後復爾併罪卿等乃定御史上下半月勾檢省中制勅文字大元兵下武州軍事判官郭秀死之丁丑緩在京差徭中山治中王善殺權知府事

李仲等以叛大元兵下合河縣縣令喬天翼等死之乙酉命樞密遣官簡嶺外諸軍之武健者養之彰德邢洺衛濬懷孟等城弱者罷遣戊子勅侯摯諭三司行部官勸民種麥無種粒者貸之九月甲午詔單州經畧使完顏仲屯宿州與右都監赫舍哩德同行帥府事丙申唐州從宜瓜爾佳天成敗宋人于桐柏丁酉尚書省請命侯摯廣營積貯上不許曰徵斂已多今更規畫不過復取於民爾防秋稍緩當量減戍兵用度幸足何至是耶

甲辰大元兵徇東勝州節度使伯特烏格死之庚戌命
行省胥鼎領兵赴河中壬子真定招撫使武仙請給金
銀符賞有功從之沿河造戰艦付行元帥府冬十月癸
亥朔定保舉縣令能否升黜舉主制乙丑用蒙古綱言
招集義軍各置都統副統等官如貞祐三年制平涼府
先以地震被命醮祭方行事慶雪見以圖來上遣官覆
驗得實是日百官奉表稱賀丁卯以完顏開權元帥左
都監郭文振權右都監並行元帥府事謀復太原壬申

定賊吏計罪以銀為則癸酉以慶雲遣官告太廟甲戌以慶雲詔國內已卯大元兵次單州境詔諸路民應遷避兵而不欲者亟遣人以利害曉之癸未裏城畢工百官稱賀宴宰臣便殿遷右丞摯官一階賜右丞相琪左丞汝礪參知政事思忠金鼎各一重幣三是役上慮擾民募人能致甃五十萬者遷一官百萬仍升一等平陽判官完顏阿拉左廂譏察霍定和發宋蔡京故居得二百萬有奇准格遷賞甲申宰臣請以裏城之功建碑會

朝門從之丁亥大元兵屯綿上壬辰命有司葺閒舍給薪米以濟貧民期明年二月罷俟時平則贍之以為常十一月癸巳朔前嵐州倉使張祐自夏來歸以樞密副使布薩安貞同簽院事額爾克行院事于河北乙未以官驢借朝士之無馬者乘之仍給芻豆己亥大元兵徇彰德府辛丑詔朝官七品外路六品以上官二歲舉縣令一人戶部令史蘇唐催租封邱期限迫促民有生刈禾輸租者上聞之遣吏按問杖唐五十縣令高希隆減

二等尚書以希隆罰輕上曰使臣至外路自非至剛者孰能不從其依前詔甲寅徐州總領納哈塔祿格大破紅襖賊于狄山禮部郎中穆延呼喇勒上疏言事丁巳

相高琪

下獄泰安軍副使張天翼為賊張林所執

以歸宋

楚州至是逃歸授睢州刺史超兩官進職

一等戊午九月兵平晉安府行元帥府事工部尚書鈕

祜祿貞死之十二月誅高琪

金史卷十五

欽定四庫全書

史部

金史卷十

六至九

詳校官國子監祭酒臣覺羅吉善

內閣中書臣李彤覆勘

總校官舉人臣章維桓

校對官學錄臣常循

謄錄監生臣張彭齡

金史卷十六

元中書右丞相總裁

托克托等修

本紀第十六

宣宗下

四年春正月壬辰朔詔免朝內申金安軍節度使行元
帥府第瓜爾佳寶倫除名廿酉大元兵下好義堡霍州
刺殺伊喇阿里哈等死之詔贈官有差庚戌宋步騎十

餘萬圍鄧州聞援兵至夜焚營去招撫副使珠格伊埒圖追及之奪其俘還士子晝晦有頃大雷電雨以風癸丑戶部侍郎張師魯上書請遣騎兵數千及春淮蜀並進以撓宋丙辰以武仙遠領中京留守進官一階三月辛丑議遷睢州治書侍御史富勒呼奉詔相視京東城池還言勿遷便乃止癸卯長春節詔免朝乙巳林州元帥惟良擒叛人單仲李俊誅之降其黨盧廣已酉以吏部尚書李復亨參知政事南京兵馬使珠嘉賽音行懷

孟帥府事辛亥進平章政事高汝礪為尚書右丞相監
修國史封壽國公參知政事李復亨兼修國史平章政
事陝西行尚書省胥鼎進封溫國公致仕壬子紅襖賊
于忙兒襲據海州經畧使完顏辰爾以兵擊敗忙兒復
取之甲寅木星犯鬼宿積尸氣夏四月庚申朔詔御史
中丞完顏伯嘉提控防城事癸亥安武軍節度使柴茂
破紅襖賊于棗強祁州經畧使段增順破叛賊甄全于
唐縣夏人犯邊元帥實嘉喀齊喀破之乙丑以彰德衛

輝滑濬諸州隸河南路轉運司以河南路轉運司為都
轉運視中都增置官吏戊辰禘于太廟大元遣趙瑞攻
陷孟州提控魯德王安復大名府以參知政事巴古拉
權尚書右丞左副元帥元帥左都監承立為右監軍權
參知政事同行尚書省元帥府于京兆庚辰東平元帥
府總領提控富察善爾破紅襖賊于聊城壬午命六部
檢法以法狀親白部官聽其面議大理寺如之五月壬
辰定二品至三品立功遷官格癸巳紅襖賊寇樂陵鹽

山橫海節度使王福連擊敗之張聚來寇又敗之甲午
上擊鞠于臨武殿丙申以時暑免常朝四日一奏事丁
酉諭工部暑月停工役癸卯大元兵徇隰州丙辰大元
兵徇兗州泰定軍節度使完顏威赫死之六月丙寅遣
人招張柔丁卯詔減監察御史四員戊辰山東民僑居
者募壯士五百人益東莒公燕寧軍月犯土星己巳太
白晝見于張百八十有四日乃伏甲戌制諸倉場庫院
巡護軍受提舉倉場司及監支納官彈壓京畿不雨勅

有司閱獄雜犯死罪以下皆釋之丁丑大元遣楊在攻
下大名又攻開州及東明長垣等縣己卯祈雨庚辰宋
人方子忻來歸有司處之鄭州上曰吾民奔宋者彼例
衣食之彼來歸者不善視之或復逃歸漏泄機事命增
子忻廩給有司優遇之元帥右監軍權參知政事承立
上封事秋七月辛卯宋人及紅襖賊犯河朔諸郡皆降
獨滄州經畧使王福固守會益都賊張林來攻福乃叛
降林帥府請討之是日雨癸丑林州行元帥府遣總領

嚴祿等討紅襖賊于彰德府生擒偽安撫使王九詔參
知政事李復亨為宣慰使御史中丞完顏伯嘉副之循
行郡縣勸農以烏庫哩仲端等使大元八月戊午朔嚴
實成江王賁據濟南山東招撫高居實遣人招嚴實于
青崖砦獲其款以聞李全犯東平府監軍王庭玉敗之
擒其偽安化軍節度使張林庚申高陽公張甫請增兵
守冀州上諭樞密潁州民渡淮為宋軍者凡十村可追
索主者懲一二以誠其餘庚午勅掌兵官不聽舉縣令

夏人陷會州刺史烏庫哩世顯降甲戌陝西行省報龕
谷敗夏人之捷乙亥上諭宰臣河南水苗唐鄧尤甚其
被苗州縣已除其租餘順成之方止責正供和糴雜徵
並免仍自今歲九月始停周歲桑皮故紙折輸流民佃
荒田者如上優免丙子陝西行省與夏人議和戊寅定
選補親軍法己卯罷葭州招撫司壬午陝西路行省承
裔報定西州之捷丙戌以隨路諸軍戶徙河南京東西
南路各設檢察使副恒山公武仙降大元九月戊子詔

遣官于河南陝西選親軍辛卯進章宗實錄戊戌大元
穆呼哩屯軍真定置總領元帥府于歸德以壽州陳留
兩鎮兵屬之庚子夏人入定西州壬寅宋人屯皂郊堡
行軍提控完顏伊都擊敗之大元遣達呼等來癸卯夏
人來侵甲辰滕州招捕提控夏義勇討紅襖賊敗之乙
巳詔參知政事李復亨提控劄糧事己酉夏人陷西寧
州尚書省都事布薩訥木舍布坐誅駙馬都尉圖克坦
壽春奪官一階杖六十癸丑更定安泊逃亡軍人罪及

捕獲賞格甲寅宋人出秦州及夏人來侵丙辰鞏州行
元帥府事實嘉喀齊喀報定西州之捷冬十月壬戌大
元遣蒙古達呼額哩埒來已卯陝西東路行省報綏德
州之捷泗州元帥府言紅襖賊一月四入寇掠人畜而
去庚辰上擊鞠于臨武殿辛巳授紅襖賊時青滕陽公
本處兵馬總領元帥兼宣撫癸未京西山寨各設守禦
使副令本路帥府總之諭陝西行省圖復會州上擊鞠
于臨武殿十一月丁亥朔免越王永功朔望朝參易水

公靖安民為其下所殺戊子黃陵岡經畧使烏庫哩沙
琿等以戰陣失律伏誅壬辰木星晝見于翼積六十有
七日伏夜又犯靈臺第一星甲午河南水遣官勸課更
浮山縣名忠孝戊戌詔復衛紹王王爵仍加開府儀同
三司壬寅山東東路軍戶徙許州命行東平總管府治
之判官一人分司臨潁乙巳詔柴茂權元帥左都監蓋
仁貴攝右都監同行元帥府于真定是月大元穆呼哩
國王以兵圍東平十二月甲戌祈雪禮部郎中權左司

金史卷之六十六 卷十六
諫穆延呼喇勒上封事戊寅詔軍官許月擊鞠者三次
以習武事庚辰臘享于太廟乙酉鎮南軍節度使溫特
赫思敬上書錢幣稅賦二事

五年春正月丙戌朔免朝丁亥世宗忌日謁奠于啓慶
宮戊子拓南京諸河逋戶舊耕官田給軍戶壬辰議禦
西夏及南伐事諭皇太子以東平禦敵方畧甲午諭樞
密院南伐事更當詳議其便撰故衛王事跡如海陵庶
人例丁酉大元兵攻天井闕戊戌宋人襲泗州西城提

控王祿死之辛丑太白晝見于牛二百三十有二日伏
乙巳詔諸道兵集蔡州己酉伐宋庚戌山東行省報東
平之捷二月丙辰朔置招撫司于單州曲赦東平府庚
申詔伐宋以內族惟弼權同簽樞密院事行院于中京
沃疇哈達權元帥府右都監行元帥府于蔡息納哈塔
降福權簽樞密院事行院于宿州富珠哩達哈權元帥
右都監完顏額琳副右都監行元帥府于唐鄧戊辰罷
懷州行元帥府復置招撫司與孟州經畧司並受中京

行樞密院節制辛未布薩安貞以兵出息州破宋人于
淨居山寺拔黃土關癸酉以旱災曲赦河南路丙子禁
京城兵器元帥赫舍哩約赫德破宋兵復泗州進逼濠
州至渦口乏糧而還西城癸未以旱災詔中外三月丙
戌朔上御仁安殿祈雨仍望祭于北郊庚寅宋人圍唐
鄧行元帥府事完顏額琳力戰却之前鄧州千戶富珠
哩摩囉歡自拔歸國額琳便宜遷其官三階授同知唐
州事乞正授以示信從之乙未罷河南路行三司丙申

參知政事圖克坦思忠進尚書右丞兼修國史以太子詹事布薩毅夫為參知政事諭宰臣曰今奉御奉職多不務采訪外事聞章宗時近侍人秩滿以所采事定升降今亦宜預為攷覈之法以激勸之戊戌長春節免朝已亥夏因叛人竇趙兒之招入據來羗城富珠哩和卓以重賞誘脅從人為內應督兵急攻城拔之省試經義進士考官於常額外多放喬松等十餘人有司奏請駁放上已允尋復遣諭松等曰汝等中選而復黜不能無

動于心方今久旱恐傷和氣今特恩放汝矣庚子賜林
州行元帥府經歷官康琚進士及第琚以武階乞赴廷
試故有是命丙午以旱禁壇祀雷雨師士子雨四月己
未山東行省蒙古綱言東莒公燕寧戰敗而死寧所居
天勝砦據險寧亡衆無所歸變在朝夕權署其提控孫
邦佐為招撫使洪果烏頁為總領以撫其衆遣使請命
勅有司議之辛酉禱雨于太廟丙寅布薩安貞破宋黃
蘄等州壬申俘宋宗室男女七十餘口獻于京師癸酉

詔親軍中武舉第而受職需次者仍執舊役廩給循常
闕至發遣辛巳監察御史劉從益以彈劾失當奪官一
階罷之詔定進士中下甲及監官散階至明威者舉充
縣令法五月甲申朔日有食之戊戌宋人據楚邱官軍
復之庚子納喇吉遜伏誅告人趙銳升職四等壬寅陝
西元帥完顏薩布遣使來獻晉安平陽之捷方議其賞
御史烏庫哩呼嚕劾其縱將士鹵掠不副主上除亂拯
民之意乞正其罪上以薩布有功詔勿問實議亦寢癸

卯唐州守將額琳為元帥薩布猶子與宋人戰唐州境上為宋人所敗死者七百餘人匿之而以捷聞御史納蘭發其事上以薩布故亦不之罪而以是意諭之乃稱納蘭敢言錄其功付有司秩滿考最癸丑東平內徙命蒙古綱行省于邳州王庭玉行帥府于黃陵岡六月甲寅朔尚書省奏駙馬都尉安貞反狀上閱奏慮其不實謂平章政事英王守純曰國家誅一大臣必合天下後世公議其令覆按之乙丑遣使諭晉陽公郭文振上黨

公完顏開各守疆土同心濟難毋以細故啟釁端誤國
事戊寅布薩安貞坐謀反並其三子皆伏誅己卯越王
永功薨庚辰輟朝壬午上親奠于殯所秋七月己亥義
勇軍叛據碭山縣庚子詔增給徐州清口等處戍兵衣
糧己酉碭山賊夜襲永城縣行軍副總領高琬敗之命
蒙古綱併力討捕辛亥單州招撫劉璣乞移河南糧濟
其軍詔給之八月壬子朔罷黃陵岡招撫司上諭尚書
省碭山叛軍家屬囚歸德旬餘不給糧恐傷其生宰臣

奏已給之矣又諭樞密河北艱食民欲南來者日益多
速今渡之母致殍死癸亥林懷帥府邀擊紅襖賊于伏
恩村敗之甲子詔南征潰軍復歸而能力戰者依出界
立功格賞之乙丑宋人掠沈邱殺縣令甲戌命有司除
逋戶負租毋徵見戶九月甲申以京東歲饑多盜遣御
史大夫赫舍哩呼實默為宣慰使往安撫之更定監察
御史違犯的決法丁亥詔州府及軍官捕盜慢職四品
以下宣慰使決之三品以上奏裁戊子增授隰州招撫

使軒成官改授西省節制乙巳崇進駙馬都尉定國公
圖克坦公弼薨庚戌歲星犯左執法右丞相高汝礪乞
致仕詔溫留之冬十月癸丑進汝礪官榮祿大夫命布
薩毅夫行尚書省于京東督諸軍芻糧乙卯太醫侯濟
張子英治皇孫疾用藥暝眩皇孫不能任遂不療罪當
死上曰濟等所犯誠宜死然在諸叔及弟兄之子便應
准法行之以朕孫故殺人所不忍也命杖七十除名尚
書省言司縣官貪暴不法部民逃亡既有決罰他縣停

匿亦宜定罪隨處土民久困徭役客戶販鬻坐獲厚利
官無所斂亦宜稍及客戶以寬土民行院帥府幕職雖
無部衆亦嘗贊畫成功而推賞止進官一階宜聽主將
保奏第功行賞上皆從其請戊午遣親軍討河南羣盜
辛酉大元兵攻綏德州壬戌夏人復侵龔谷甲子勅監
察所彈事同列不可預聞著為令丁卯夏人犯定西積
石之境戊寅分京畿戍卒萬二千河中民兵八千以許
州元帥赫舍哩鶴壽將之屯潼關西十一月癸未陝西

東路行省報安塞堡敗夏人之捷甲申諭太府減損食
品庚寅募民興南陽水田壬辰太子親王百官表賀安
塞堡之捷却之乙未夏人攻龕谷宋人攻蘄縣紅襖賊
掠宿州辛丑詔蠲徐邳宿泗等州逋租官民有能墾闢
閒田除來年科徵歸德毫壽潁停闕逋戶租外仍蠲三
之一逋戶田廬有司募民承業禁其毀損以俟來復蒲
城縣民李文秀等謀反伏誅壬寅宋人焚潁州執防禦
判官而去是日相國寺大火元兵攻延安十二月辛亥

朔以大元兵下潼關京兆詔省院議之士子罷辟舉縣
令法丁巳禮部侍郎烏克遜仲端翰林待制安庭珍使
北還各遷一階庚申罷河南義軍丁卯詔罷新簽民軍
減樞密院掌兵官及京城戍兵仍諭行院帥府毋擅增
設補簽辛未罷行總管府及招討統軍檢察等司定宋
人來歸賞格及詐誘征防軍人逃亡罪法癸酉元帥哈
達邁珠及其將士以延安功特賞賚之仍下詔獎諭閏
月辛巳朔大元兵徇鄜州保大軍節度使完顏魯爾錦權

元帥左都監赫舍哩鶴壽右都監富察羅索遙授金安
軍節度使鈕祜祿資祿皆死之乙酉提控珠嘉耀珠破
沈邱賊于陳瓦丙戌頒詔撫諭河南土寇戊子熒惑犯
軒轅己丑孫瑤及捕盜官烏肯徹招降泰和縣賊二千
人詔斬其首惡餘皆釋之同知保靜軍節度使郭澍以
徵糧失期誣殺平民坐誅辛卯官軍復葭州癸巳通遠
軍節度使富珠哩和卓削官甲午月犯熒惑丙申紅襖
賊夜入蒙城縣縣官失其符印軍民死者甚衆賊大掠

而去戊戌鎮星晝見于軫己亥發兵捕京東盜太白晝
見于室壬寅發上林署粟振貧民陳亳等州鹿邑城父
諸縣盜蠶起趣樞府遣官討之捕盜軍所過殘民遣御
史一人按視軍所獲牛有司以官錢收贖戊申詔定招
捕土寇官賞格己酉更造興定寶泉每一貫當通寶四
百貫

元光元年春正月庚戌朔免朝辛亥世宗忌辰謁奠于
啓慶宮元帥惟弼破紅襖賊于張騫店壬子遣官墾種

京東西路三路水田甲寅禁非邊關急速事無馳傳有
溫乘者州縣徑白省部四方館從御史臺外路從分按
御史治之詔陝西西路行省從京兆者兵退還治平涼
防州刺史巴延實喇以彙城伏誅鄭州防禦使費摩洋
格同知防禦使瓜爾佳實倫除名西面節度使巴古珠
奪官一階丁卯下詔撫諭京東百姓壬子詔徙中京唐
鄧商號許陝等州屯軍及諸軍家屬赴京兆同輩就糧
屯二月乙酉陝西西路行省請以厚賞募河西諸番部

族寺僧圖復大通城命行省樞密院籌之癸巳上諭宰
臣宋人以重兵攻平興壤信我師力戰却之入偵知其
事狀之詳若俟帥府上功推賞豈急于勸獎之道其遣
清望官齋空名宣勅覈實給之乙未詔諭河南陝西大
元兵屯葭州壬寅權定行省樞府元帥府輒杖左右司
經歷司官罪法甲辰上念廊延被兵又延安受圍嘗發
民粟給軍詔除延安廊坊丹葭綏德稅租仍令有司償
其粟直不足者許補官戊申恒州軍變萬戶呼延棧等

千餘人殺掠城中焚廬舍去己酉遣元帥左監軍額爾
克行元帥府事節制三路軍馬伐宋同簽樞密院事時
全行院事副之三月辛酉宋人掠確山縣之劉村丙寅
歲星犯太微左執法戊辰樞密院委差官賈天安疏陳
利害壬申尚書右丞圖克坦思忠以病馬輸官冒取高
價御史劾之有司以監主自盜論死上顧惜大體降陳
州防禦使癸酉提控李師林敗夏人于永木嶺郭文振
表近得俘者言南北合兵將攻河南陝西詔樞密備禦

夏四月辛巳以金吾衛上將軍勸農使額爾克發樞密院事置大司農司設大司農卿少卿丞京東西南三路置行司並兼採訪事壬午大元兵攻陵川縣丁酉林懷路行元帥府事惟良削官兩階罷之更定辟舉縣令之法而復行之戊戌籍丁憂待闕追殿等官備防秋丁未行樞密院報淮南之捷五月戊申朔大元兵屯隰吉翼等州壬戌額爾克時全軍大敗甲子額爾克以敗績當死上數責之勉其後效命廢官兩階丁卯召致政胥鼎

等赴省議利害壬申時全伏誅六月戊寅朔造舟運陝
西糧由大慶關渡抵湖城癸未大赦陳州防禦使呂子
羽坐乏軍興自盡制諸監官及八品以下職事丁憂待
闋任滿遙授者試補侍衛親軍命各路司農司設捕盜
方畧丁酉紅襖賊掠柳子鎮驅百姓及驛馬而去提控
張瑀追擊奪所掠還偽監軍王二據黎陽縣提控王泉
討之復其城七月庚戌大元將阿勒楚爾屯其衆晉安
冀州之境丙辰上黨公完顏開復澤州己未歸德行樞

察院王庭玉報曹州破紅襖賊之捷庚申定監當官選
法河北羣盜犯封邱開封界令樞密院禦捕甲子京東
總帥赫舍哩約赫德請自今行院帥府幕職有過得自
決之不允戊辰紅襖賊襲徐州之十八里砦又襲古城
桃園官軍破之乙亥太白晝見經天與日爭光八月丁
丑定西征將士官賞有差己卯彗星見西方甲申增定
藏匿逃亡親軍罪及告捕賞格積石州番族叛附于夏
鞏州提控尼瑪哈薩蘭討之獲羊千口進尚膳詔却之

以彗星見改元大赦諭旨宰臣曰赦書已頒時刻之間人命所係其令將命者速往計期而至以大司農巴古拉為參知政事癸巳河間公伊喇重嘉努高陽公張甫兵復河間府是日報捷者始達上以道途梗塞報者艱虞命厚賞之夏人入德順壬寅祈雨九月丙午朔以左右警巡使兼彈壓諭陝西行省備邊壬子約赫德請以兵由壽州渡淮擣宋巢穴不從乙卯議畧淮南己巳宋人掠遂平縣之石砦店復侵南陽唐州提控瓜爾佳

玖珠敗之冬十月丁丑夏人掠德順之神林堡壬午宋
張惠攻零子鎮為鄂爾多所敗虜其裨將二人河中府
萬戶孫仲威執其安撫使阿布哈呼喇勒據城叛陝西
行省遣將討平之癸未復曹州甲申上獵于近郊詔免
百官送迎且勿令治道以勞百姓庚寅徙彰德招撫使
杜先軍于衛州乙未大元兵下滎州之胡壁堡及臨晉
庚子詔所司巡護避兵民資產甲辰以京兆官民避兵
南山者多至百萬詔兼同知府事完顏霆等安撫其衆

十一月丁未大元兵徇同州定國軍節度使李復亨同
知定國軍節度使額爾克死之甲寅京東總帥約赫德
報臨淮破宋兵之捷戊辰大元蒙古布哈攻鳳翔府十
二月乙亥朔上謂皇太子曰吾嘗夜思天下事必索燭
以記明而即行汝亦當然以河中治中侯小叔權元帥
府右都監許便宜行事乙酉遷同知平陽府事史詠龍
虎衛上將軍賜號守節忠臣權行平陽公府事丁亥疊
州總管青伊克卒特命其子角襲職詔諭近侍局官曰

奉御奉職皆少年不知書朕憶曩時置說書人日為講
論自古君臣父子之教使知所以事上者其復置已丑
蘭州提控唐古昉敗夏人于質孤堡大元以大軍攻鳳
翔

二年春正月甲辰朔詔免朝賀乙巳世宗忌日謁奠于
啓慶宮右丞相汝礪乞致政上面諭使留大元兵下河
中府權元帥右都監侯小叔復之壬子壽州防禦使完
顏朮爾奪官四階甲寅上諭宰臣曰向有人言便宜事

卿等屢奏乞作中旨行之帝王從諫足矣豈可掠人之
美以為己出哉戊午四方館使李奇魯以罪罷宰臣請
以散地羈縻之上曰此輩豪傑正須誠待若以術制適
使自疑但不畀軍政外補何害授奇魯樞州刺史又謂
鬻爵恩例有丁憂官得起復者是教人以不孝也何為
著此令哉丁卯大元兵復下河中府二月甲戌崩皇后
生辰詔免賀禮己卯丞相汝礪朝會免拜設榻殿下久
立賜休壬午詔軍官犯罪舊制更不任用今多故之秋

人才難得朕欲除大罪外徒刑追配有武藝善掌兵者
量才復用其令尚書省議以聞丁亥大赦己亥鳳翔圍
解實嘉喀齊喀加金紫光祿大夫升左監軍特授大名
府海魯克繖明安完顏仲元加光祿大夫升右監軍特
授河北東路推必喇明安各賜金鞶帶有差三月甲辰
朔宋人襲汝陽壬子誠諭平章英王守純崇飲癸丑以
河中府推官嘉勒幹權元帥右都監代領侯小叔軍甲
寅上謂宰臣人有才堪任事其心不正者終不足貴丞

相汝礪對曰其心不正而濟之以才所謂虎而翼者也
雖古聖人亦未易知上以為然丙辰長春節免朝以戶
部尚書實嘉烏新為參知政事兼修國史辛酉禁茶壬
戌詔以鳳翔戰功及頒賞等級徧諭諸郡甲子以完顏
伯嘉權參知政事行尚書省于河中府辛未詔職官犯
罪非死罪除名遇赦幸免有才幹者中外並用夏四月
癸酉朔復霍州汾西縣詔給空名宣勅遷賞將士之有
功者丙子設京兆南山安撫司丁丑故鳳翔萬戶完顏

綽哈以死節贈懷遠大將軍授刺史職其父恕除以功
例賞外遷兩官升職二等己卯遣官閱河南帥府見兵
籍閑官豪右親丁及遼東河北客戶為軍庚子募西山
獵戶為軍五月癸卯朔始造元光重寶丙午復河中府
及榮州遣人持檄招前恒山公武仙乙卯權平陽公史
詠復霍州及洪洞縣丁巳始造元光珍貨同銀行用戊
午以檄招東平嚴實己未參知政事毅夫言脅從人號
忠孝軍而置訟准者所為多不法請防閑之上曰人心

無常顧馭之何如爾馭之有術遠方猶且聽命況此輩
乎不然雖左右亦難防閑正在廊開大度而已若是而
不能致太平者命也庚申簽河南路寄居官民充軍辛
酉徙晉陽公郭文振兵于孟州甲子徙權平陽公史詠
兵于解州河中府六月乙亥京東總帥報淮南之捷丁
亥罷行省所置監察御史兼彈壓之職戊子議遣人招
李全嚴實張林甲午詔罷河中行省置元帥府辛丑遙
授靜難軍節度使延扎哈瑪爾等以保鳳翔功進官秋

七月壬寅朔夏人犯積石州羗界寺族多陷沒惟臧博
寺僧堪布扎巴薩木及達納寺僧班珠爾拒而不從詔
賞諸僧鈐轄正將等官給以廩祿乙巳遣兵守衛解州
鹽池庚戌以空名宣勅遷賞諸部降人壬子除市易用
銀及銀與寶泉私相易之禁癸丑勅諸御史曰瑣細事
非人主所宜詰然凡涉姦弊靡不有闕國政者比聞朝
官及承應人月給俸糧多雜糠土有司所收豈有是物
哉至于出納斗斛亦小大不一此皆理所不容者而臺

官初不問事事須朕言之安用汝曹也乙卯丹鳳門凜
丁巳揚布族之古梁們等叛歸夏元帥瓜爾佳瑞發兵
討之以捷聞御史中丞師安石言制敵二事戊午宰臣
方對次有司奏前奉御溫都太平卒上大駭曰朕屢欲
授太平一職每以事阻今僅授之未數日而亡豈非天
邪因謂宰臣曰海陵時有護衛二人私語一曰富貴在
天一曰由君所賜海陵竊聞之詔授言由君所賜者以
五品職意謂誠由已也而其人以疾竟不及授章宗秋

還聞平章張萬公薨歎曰朕迴將拜萬公丞相而遂不起命也乙丑詔籍陝西路僑居官民為軍八月辛未朔邳州從宜經畧使納哈塔祿格等率都統金山顏俊以沂州百餘人入省署殺行尚書省蒙古綱據州反壬申詔賞京兆路官軍保全南山諸谷之功以所全人數多寡為等第千人以上官一階三千人以上兩階五千人以上三階仍陞職一等能以力戰護之者又增一階戰沒者就以贈之甲戌遣官持空名宣敕諭以重賞招納

哈塔祿格拒命即命約赫德合行院兵討滅之乙亥火星入鬼宿中掩積尸氣乙酉詔能捕反賊祿格者除見定官外仍與世襲穆昆丙戌遣官分行蔡息陳毫唐鄧裕諸州洎司農司州縣吏同議凡民丁相聚立砦避兵與各巡檢軍相依者五千戶以上直砦長一員百戶增副一員仍先遷一官能安民弭盜勸農者論功注授九月庚子朔日有食之宋人入壽州鈕祜祿博諾力戰却之壬寅樞密院奏提控珠嘉算緯和破宋人之功甲辰

宋人攻南陽丙午約赫德報桃園淮陽捷並以納哈塔
魯爾錦結搆李全之狀朱告戊申降人孫邦佐自李全軍
中歸遂授知東平府兼山東西路兵馬都總管官軍與
宋人力戰于胡陂而却之提控珠格綽爾遇害癸丑納
哈塔祿格所署偽都統烏庫哩賽罕瓜爾佳瑠珠等來
歸己未贈珠格綽爾銀青光祿大夫丙寅扎木雅呼魯
等拔邳州南城丁卯權御史中丞師安石等劾英王守
純不實付有司論罪尋詔免而責諭之冬十月癸酉徙

晉陽公郭文振等兵于衛州乙亥制行樞密院及元帥
府農隙之月分番巡徼校獵月不過三次丁丑上獵于
近郊己卯狩于太廟壬午火星犯靈臺乙酉上獵于近
郊辛卯詔石壕店河池永寧縣各屯兵千人壬辰滕州
人時明謀反伏誅戊戌唐鄧行元帥報淮南之捷十一
月己亥朔紅襖賊偽監軍徐福等來降進約赫德官一
階賜金幣有差辛丑總帥約赫德報邳州之捷函叛人
祿格首以獻開封縣境有虎啞人詔親軍百人射殺之

賞射獲者銀二十兩而以內府樂賜傷者丙午邳州紅
襖賊三千來降初擬置諸陳許之間上以為若輩雖降
家屬尚在河朔餘黨必殺之所得者寡而被害者衆亦
復安忍不若命使撫諭加以官賞而遣之還果忠于我
雖處河朔豈負我邪且餘衆感恩將有效順者矣戊午
以上黨公完顏開之請諭開及郭文振史詠王遇張道
盧芝等各與所鄰帥府相視可耕土田及瀕河北岸之
地分界而種之以給軍餉辛酉鞏州行元帥府報會州

破夏人之捷十二月己巳朔徙汾淮巡檢邊軍于內地
癸酉以空名宣命金銀符給完顏開賞功辛巳詔延安
土人充司縣官義軍使者選人代之量免其民差稅邛
州民丁死戰陣者各贈官一階歸德徐邛宿泗永毫潁
壽等州復業及新地民免差稅二年見戶一年嘗供給
邛州者復免一年之半睢州陳留杞縣免三之一丁亥
上不豫免朝戊子皇太子率百官及王妃公主入問起
居己丑復入問起居庚寅上崩于寧德殿壽六十有一

上疾大漸暮夜近臣皆出惟前朝資明夫人鄭氏年者侍側上知其可託詔之曰速召皇太子主後事言絕而崩夫人秘之是夜皇后及貴妃麗氏問安寢閤麗氏陰狡機慧常以其子守純年長不得立心鞅鞅夫人恐其為變即給之曰上方更衣后妃可少休他室伺其入遽鎗之急召大臣傳遺詔立皇太子始啓戶出后妃發喪皇太子方入宮英王守純已先入皇太子知之分遣樞密院官及東宮親衛軍官伊喇布哈集軍三萬餘于東

華門街部署既定命護衛四人監守純於近侍局乃即
皇帝位于樞前壬辰宣遺詔是日詔赦中外明年正月
戊戌朔改元正大諡大行曰繼天興統述道勤仁英武
聖孝皇帝廟號宣宗三月庚申葬德陵

贊曰宣宗當金源末運雖乏撥亂反正之材而有勵精
圖治之志迹其勤政憂民中興之業蓋可圖也然而卒
無成功者何哉良由性本猜忌崇信讐御獎用吏胥苛
刻成風舉措失當故也執中元惡此豈可相者乎顧乃

懷其援立之私自除廉陞之分悖禮甚矣高琪之誅執
中雖云除惡律以春秋之法豈逃趙鞅晉陽之責既不
能罪而遂相之失之又失者也遷汴之後北顧大元之
朝日益隆盛智識之士孰不先知方且狃于餘威牽制
羣議南開宋蚌西啓夏侮兵力既分功不補患曾未數
年昔也日闢國百里今也日蹙國百里其能濟乎再遷
遂至失國豈不重可歎哉

金史卷十六

欽定四庫全書

金史卷十七

元中書右丞相總裁托克托等修

本紀第十七

哀宗上

哀宗諱守緒初諱守禮又諱寧嘉蘓宣宗第三子母曰明惠皇后王氏賜姓溫都氏仁聖皇后之女兄也承安三年八月二十三日生於翼邸仁聖無子養為己子泰

和中授金紫光祿大夫宣宗登極進封遂王授秘書監
改樞密使貞祐初莊獻太子守忠薨立皇孫鑑為皇太
孫尋又薨四年正月己卯立守禮為皇太子仍控制樞
密院事詔畧曰子以母貴遂王守禮地鄰冢嫡慶集元
妃立為皇太子其典禮有司條具以聞四月甲午用太
子少保張行信言更賜名守緒元光二年十二月庚寅
宣宗崩辛卯奉遺詔即皇帝位于柩前壬辰詔大赦畧
曰朕述先帝之遺意有便於時欲行而未及者悉奉而

行之國家已有定制有司往往以情破法使人罔遭刑
憲今後有本條而不遵者以故入人罪罪之草澤士庶
許令直言軍國利害雖涉譏諷無可米取者並不坐罪
正大元年春正月戊戌朔詔改元正大庚子上居廬百
官始奏事秘書監權吏部侍郎審察和卓改桓州刺史
左司員外郎尼瑪哈華山改同知楨州軍州事遂二姦
臣大夫士相賀邠州節度使伊喇瑪納布貢白兔詔曰
得爾臣輔佐年穀豐登此上瑞也焉事此為令有司給

道里費縱之本土禮部其徧諭四方便知朕意丁巳詔
朝臣議修復河中府禮部尚書趙秉文太常卿楊雲翼
等言陝西民方疲敝未堪力役遂止戊午上始視朝大
司農守汝州防禦使李蹊為太常卿權參知政事平車
政事荆王守純罷判睦親府參知政事布薩烏錦罷充
大行山陵使尊皇后溫都氏元妃溫都氏皆為皇太后
號其宮一曰仁聖一曰慈聖百官入賀于隆德殿是日
大風飄端門瓦特嘉喀齊喀權樞密副使有男子服麻

衣望承天門且笑且哭詰之則曰吾笑笑將相無人吾
哭哭金國將亡羣臣請寘重典上持不可曰近詔草澤
諸人直言雖涉譏訕不生法司唯君門非笑哭之所重
杖而遣之南陽民布陳謀反伏誅三月熒惑犯左執法
戊申未安宣宗御容于孝嚴寺辛亥丞相高汝弼薨矣
丑葬宣宗于德陵甲寅起復邠州節度使致仕張行信
為尚書左丞以延安帥臣完顏哈達戰禦有功授金虎
符權參知政事行尚書省事于京兆兼統河東兩路夏

四月癸酉宣宗祔廟大赦中外蒙感犯名執法五月戊戌平章政事巴古拉薨癸卯樞密副使完顏薩布為平章政事權參知政事實嘉烏新為尚書右丞太常卿李蹊為翰林承旨仍權參政甲辰賜策論進士富珠哩察罕以下十餘人及第經義進士張介以下五人及第戊申賜詞賦進士王鶚以下五十人及第詔刑部登聞檢鼓院毋鎖閉防護聽寃者陳訴六月甲戌宰執請擊鞠上以新喪不許辛卯立妃圖克坦氏為皇后遣樞密別

官伊喇布哈率兵至光州榜諭宋界軍民更不南伐秋
七月己亥詔諭百官各勤乃職癸卯補修大樂九月樞
密判官伊喇布哈復澤潞獲馬千匹冬十月戊午夏國
遣使來修好十二月乙巳桓州刺史富察和卓有罪伏
誅甲寅宣宗小祥饒飯于德陵改定辟舉縣令法以六
事課縣令京東西南陝西設大司農司兼採訪公事京
師大司農總之左丞張行信言先帝詔國內刑不上大
夫治以廉恥丞相高琪所定職官犯罪的決百餘條乞

改依舊制上欲彰先帝之美畧施行之

二年春正月甲申有黃黑之祲夏四月辛卯朔恒山公武仙自真定府來奔起復致仕莘國公胥鼎為平章政事行省事于衛州進封英國公甲午京畿旱遣使慮囚鈞許州大雨雹丁酉宿鄭州雨傷麥五月丁丑以旱甚責已避正殿戒膳赦罪撫谿自大名來奔詔置谿許州秋七月都水富察瑪哈雅納殺人免死除名八月鞏州元帥田瑞反行省單園之其母弟實格殺瑞出降赦其罪

以為涇州節度使世襲明安九月夏國和議定以兄事
金各用本國年號遣使來聘奉國書稱弟冬十月以夏
國修好詔中外新軍政改總領為都尉己酉以誅田瑞
詔中外癸亥遣禮部尚書鄂忠良弼大理卿費摩欽甫
侍御史烏克遜弘毅為夏國報成使國書稱凡己亥面
諭臺諫完顏蕪呼陳規曰宋人輕犯邊界我以輕騎襲
之冀其懲創通好以息吾民爾夏人從來臣屬我朝今
稱弟以和我尚不以為辱果得和好以安吾民尚欲用

兵于卿等宜悉朕意伊喇布哈及宋人戰于光川獲馬
數千殺人千餘而還內族王嘉努故殺鮮于主簿權貴
多救之者上曰英王朕凡敢妄擅一人乎朕為人主敢
以無罪害一人乎國家衰弱之際生靈有幾何而族子
恃勢殺一主簿吾民無主矣特命斬之詔有司為死節
士十有三人立褒忠廟禁宿泗青口巡邊官兵毋復擅
殺過淮紅衲軍詔趙秉文揚雲翼作龜鏡萬年錄

三年春正月丁巳朔夏國遣使來賀三月陝西旱平章

政事胥昂復請致仕不許詔尚書省議省戒用度夏四月辛卯親享于太廟郊國夫人車經御路過廟前馭者乘馬二婢坐車中俱不下詔繫獄杖之辛丑以旱遣官禱于濟瀆癸卯祈于太廟禁燬扇河南大雨雹己酉遣使慮囚遣使捕蝗五月己未大雨宋兵掠壽州境癸亥永州桃園軍失利死者四百人乙丑大雨壬申詔諭陝州趙甫等能以土地來歸當任使之六月辛卯京東大雨雹蝗盡死壬子詔諭高麗及遼東行省格緬額討反

賊萬嘉努赦脅從者秋七月庚午平章政事英國公胥
昂薨八月伊喇布哈復曲沃及晉安辛卯詔設益政院
于內廷以禮部尚書楊雲翼等為益政院說書官日二
人直備顧問冬十月丁酉夏使來報哀十一月庚申議
興宋修好戊辰又議之己巳宋忠義軍夏全自楚州來
歸楚州王義深張惠范成進以城降封四人為郡王辛
未改楚州為平淮府以夏全等來降赦諸路從宋及淮
楚官吏軍民并其家屬甲戌遣使夏國賀正旦丙子夏

以兵事方殷來報各停使聘大元兵征西夏平中興府
召陝西行省及陝川總帥完顏額爾克靈寶總帥赫舍
哩約赫德赴汴議兵事諭陝西兩省凡戎事三品以下
官聽以功過賞罰之銀二十五萬兩從其給賞遣中大
夫完顏履信為弔祭夏國使

四年春正月壬戌增築中京城浚汴城外濠二月市哈
約赫德復平陽執知府李齊勤獲馬八十三月終勞效
官充軍有怨言遂不果用詔以銀贖平陽虜獲男女分

賜官軍者聽自便大元兵平德順府節度使愛新攝府
判馬肩龍死之大元兵復下平陽已巳徵夏稅二倍夏
五月丁丑議乞和于大元大元兵平臨洮府總管圖們
呼圖克們死之陝西行省進三策上策自將出戰中策
率陝州下策棄秦保潼關不從六月戊申朔遣前御史
大夫完顏哈昭為議和使丙辰地震太白八井賜詞賦
經義盧亞以下進士第秋七月大元兵自鳳翔徇京兆
關中大震工部尚書師安石為尚書右丞壬辰以中丞

烏克遜布希祭酒費摩阿古岱兼司農卿簽民軍勸率
富民入保城聚兼督秋稅令百姓知避遷之計丁酉故
陝西東西兩路賜民今年租八月庚戌詔有司罷遣防
備丁壯修城民夫軍須差發應不急者權停己巳萬年
卽同知集賢院史公奕進大定遺訓待制呂造進尚書
要略是日大風落左掖門鴟尾壞丹鳳門扉頃霜殺禾
季全自益都復入楚州據之遣總師完顏額爾克元帥
慶善努守盱眙全戰于龜山敗績冬十月辛酉右拾

遣李大節右司諫陳覲劾同判睦親府事薩哈連姦賊
不報壬戌外臺監察御史諫獵上怒以邀名責直責之
詔贈德順府死事愛新馬肩龍等官以淮南王爵招李
全十一月乙未未時日上有二白虹貫之丁酉獵于近
郊十二月真授李暉參知政事大元兵下高川壬子遣
使安撫陝西以牛千頭賜貧民

五年春正月丁丑親祭三廟庚辰遣知開封府事完顏
莽伊蕪如大元弔慰丙戌議擊盱眙辛卯以龜山之敗

降元帥虔善勞為定國軍節度使二月乙巳朔大寒雷雨雪木之華者盡死癸丑詔有司塑臨洮總管圖們呼圖克們像入襄忠廟書死節子孫于御屏量材官使之三月甲戌朔羣臣請依祖宗故事樞密院聽尚書省節制不從乙酉監察御史烏庫哩布魯魯劾近侍張又奇張仁壽李麟之受饋遺曲赦其罪而出之夏四月甲辰朔以御史言三姦不已凡四日不視朝八日議放還西夏人口丙寅右丞師安石薨親衛軍王權闕幽酒殺其

孫大理寺當以徒刑特命斬之五月癸巳定國軍節度使慶嵩努以受賂奪一官六月壬戌以旱赦雜犯死罪己下秋七月戊子同判睦親府事薩哈連出為中京留守行樞密院事八月乙卯以旱遣使禱于上清宮甲子參知政事博索為尚書右丞太常卿延扎舒魯權參知政事增築歸德行樞密院擬工役數百萬詔遣樞密院判官白革喻以農夫勞苦減其工三之二以卹制不一併銜州帥府於恒山公府命白革往經畫之九月庚

寅雨足始種麥冬十一月辛巳進宣宗實錄十二月庚子朔日有食之完顏莽伊蘇以奉使不職免死除名壬子完顏納新改侍講學士充國信使以陝西大寒賜單士柴炭銀有差京兆鳳翔府司竹監進竹令分給之六年春二月丙辰樞密院判官伊刺布哈權樞密副使耀州刺史李興有戰功詔賜玉兔鶻帶金器以丞相完顏薩布行尚書省事于闐中召平章政事完顏哈達還朝伊刺布哈率忠孝軍總領完顏陳和尚忠孝軍一千

騎駐邠州遣白華馳喻布哈以用兵之意詔樞密更給
忠孝軍馬匹以漸調發都尉司步卒及忠孝馬軍屯京
西以白華專備軍須三月乙亥忠孝軍總領陳和尚有
戰功授定遠大將軍平涼府判官世襲穆昆夏五月隴
州防禦使舒穆魯棟爾進黃鸝鵲詔中外方獻珍奇進
物性損人力令勿進秋七月罷陝西行省軍中浮費八
月丙申伊刺布哈再復澤潞九月洮河蘭會元師延扎
哈瑪爾進西馬二匹詔曰卿武藝超絕此馬可充戰用

朕乘此豈能盡其力既入進即尚廐物也仍以賜御冬
十月乙未朔伊利布哈束還令陳和尚率陝西歸順馬
軍七鈞許入元兵駐慶陽界詔陝西行省遣使奉羊酒
幣帛乞緩師請和十一月遣使鈞許選試陝西歸順人
得軍二千以藝優者充忠孝軍次充和爾和軍十二月
乙未詔副樞布哈總帥赫舍哩約赫德權發樞密院事完
顏額爾克救慶陽罷附京獵地百里聽民耕稼

七年春正月副樞布哈總帥約赫德權發院事額爾克

解慶陽之圍以額爾克屯邠州布哈約赫德還京兆夏
五月釋清口宋敗軍三千人願留者五百人以屯許州
餘縱遣之賜經義詞賦李瑋以下進士第秋七月以平
章政事哈達權樞密副使八月賜陝西死事之孤鹽引
及絹仍量材任使大元兵圍武仙于舊衛州冬十月己
未朔平章哈達副樞密布哈引兵解衛州圍上登承天門
犒軍哈達布哈並世襲穆昆伊喇布哈權叅知政事同
哈達行省事于閭鄉以備潼關

八年春正月大元兵圍鳳翔遣樞密院判官白華右司
郎中瓜爾佳巴喇瑪諭閭鄉行省進兵哈達布哈以未
見機會不行復遣白華諭哈達布哈將兵出關以解鳳
翔之圍又不行夏四月丁巳朔赦全免京西路軍需錢
一年旱災州縣差稅從實減貸大元兵平鳳翔府兩行
省棄京兆遺居民於河南禹慶善等予之五月李全妻
楊妙真以全陷沒于宋構浮梁楚州北欲復宋讎遣哈
達布哈屯桃源界激河口以構侵軼宋八里莊人拒其

主將納哈達布哈詔改八里莊為鎮淮府秋七月宋將
樊淳梁九月丙申慈聖宮皇太后溫都氏崩遣詰園陵
制度務從儉約大元兵駐河中府慶善坊棄京兆東還
召哈達布哈赴汴議引兵趨河中府懼不敢行還陝州
出師至今水谷而歸大元兵攻河中府哈達布哈遣元
帥王敢率兵萬人救之冬十月右丞相薩布敦仕十一
月丁未大元進兵饒風關由金州而東省院議以速待
勞未可與戰上諭之曰南渡二十年所在之民被田宅

孺妻子竭肝腦以養軍今兵至不能進戰止以自護京
城縱存何以為國天下其謂我何朕思之熟矣存與亡
有人命惟不負吾民可也乃詔諸將屯軍襄鄧十二月
己未聖明忠皇后河中府破權簽樞密院事草大顙爾
克死之元即板子顙爾克提敗卒三千走閬鄉詔敕將
佐以下杖顙爾克二百以元哈達布哈率諸軍入鄧州
楊沃衍陳和尚武仙皆引兵來會出屯順陽戊辰大元
兵渡漢江而北丙子哈達布哈將兵禦于禹山之前大

元兵分趨汴京京師戒嚴是夜二鼓哈達布哈引軍還
鄧州大元兵蹕其後盡獲其輜重

天興元年

是年本正人元年正月改元開興四月又改元大興

春正月壬午朔日

有兩珥大元兵適唐州元帥完顏兩羅索與戰哀城之
汝墳敗績兩羅索走汴京遣完顏莽伊蘇等部民丁萬
人決河水衛京城癸未置尚書省樞密院于宮中以便
召問起前元帥瓜爾佳實倫權昌武軍節度使行元帥
府事哈達布哈引軍自鄧州赴汴京乙酉以點檢瓜爾

往薩哈為總帥將兵三萬巡河渡權近侍局使圖克坦
長樂監其軍起近京諸邑軍家屬五十萬口入京丙戌
大元兵定河中由河清縣白坡渡河丁亥長樂薩哈引
兵至封邱而還戊子左司郎中錫然愛實上書請斬長
樂薩哈以肅軍政不從都尉烏凌阿等圖一軍自潼關
入援至偃師聞大元兵渡河遂走登封少室山壬辰衛
州節度使完顏薩尼雅布棄城走甲午修京城樓櫓
及守禦備大元兵薄鄭州與白坡兵合屯軍凡帥馬伯

堅以城降防禦使烏凌阿雅珠死之乙未大元游騎至
汴城丁酉大雪大元兵及兩省軍賊鈞州之三峯山兩
省軍大潰哈達陳和尚楊沃衍走鈞州城破皆死之樞
密副使布哈就執尋亦元武仙走密縣自是兵不復振
己亥徐州行省完顏慶善努引兵入援義勝軍校侯進
杜正張興率所部北降慶善努入睢州庚子御臨門肄
教改元開興辛丑潼關守將李平以關降大元壬寅扶
溝民錢大多李鈞叛殺縣令王浩及簿尉庚戌許州軍

變殺元師瓜爾佳寶倫鈕祜祿全周蘇椿等以城降大
元二月壬子剏慶善努謀走歸德至陽驛店遇大元兵
徐帥完顏烏里力戰而死慶善努被擒使招京城不從
睢州刺史張文壽棄城從慶善努皆死之甲寅大元兵
徇臨渙攝縣令張若愚死之戊午次盧氏關陝行省總
帥兩軍及秦藍帥府軍棄潼關而東與之遇大雪未戰
而潰行省圖克坦烏登總帥納哈塔和碩敗死完顏重
喜降斬于馬前都尉鄭個殺都尉苗英亦降秦藍總帥

府經歷商衡死之大元兵下睢州庚申翰林待制馮延
登使北來歸乙丑大元兵攻歸德庚午起復右丞相致
任薩布為左丞相括京師民單二十萬分諫詣師人月
給粟一石五斗三月丁亥大元軍平中京留守薩哈連
投水死甲午命平章政事博索宿上清宮樞密副使喀
齊喀宿大佛寺以備緩急大元遣使自鄭州來諭降使
者立出國書以授譯火譯史以授宰相跪進上起立受
之以付有司書索翰林學士趙秉文衍聖公孔元

措等二十七家及歸順人家屬布哈妻子繡女弓匠鷹
人人數十人庚子封荆王子額爾克為曹王議以為質
密國公琦以曹王幼請代上慰遣之不聽其代壬寅尚
書左丞李蹊送曹王出質諫議大夫費摩阿古岱太府
監國世榮為請和使戶部侍郎楊慥權參知政事分軍
防守四城大元兵攻汴城上出承天門撫西面將士千
戶劉壽語不遜詔釋勿問癸卯上復出撫東面將士親
傳戰傷者藥于南薰門下仍賜卮酒出內府金帛花皿

以賞戰士乙巳鳳翔府破軍萬戶王阿嚕樊喬來歸已
酉造輦車三千兩已而不用置局養無家俘民夏四月
癸丑兵士李新有功擢四方館使元帥劉益叱其子戰
死丁巳遣戶部侍郎楊仁奉金帛詣大元兵乞和戊午
又以珍異往謝許和癸亥明惠皇后陵被發大柩所在
遣中官往視之至是始得以兵護宮女十人出迎朔門
奉柩至城下設御幄安置是夜復葬之戮鄭倜妻子甲
子御端門肆赦改元興詔內外官民能完復州郡者

功賞有差出金帛酒炙犒餼軍士戒御膳罷冗員放宮
女上書不得稱聖改聖旨為制旨釋錡屬王衛紹玉二
妹禁錮聽自便乙丑百官初起居于隆德殿前丙寅以
尚書省兼樞密院事丁卯放宮女聽以衣裝自贖金珠
留犒士卒汴京解嚴步軍始出封邱門采薪蔬己巳建
威郡尉完顏鄂倫同大元使摩多入城庚午見使臣於
隆德殿放宮女如前辛未開鄭門聽百姓男子出入甲
戌御承天門大饗將士聞有聲屈者乃還宮乙亥有詔

止奏事許州進櫻桃五月辛巳遷民告出城者以萬數
薩布傳索不聽乙酉以南陽郡王子思烈行尚書省于
鄧州召援兵丙戌拜天於大慶殿詔博索致仕放京城
四面軍李辛不奉詔丁亥鑿洧川漕渠尋罷之馮延登
以奉使有勞授禮部侍郎戊子裕州鎮防軍將領賀德
希率西軍二千人入援故遷民出京辛卯大寒如冬密
國公璿薨汴京大疫凡五十日諸門出死者九十餘萬
人貧不能葬者不在是數癸巳楊春入據亳州觀察判

官劉玃死之卒丑上御香閣面責宰相乙巳將相受保
城爵賞六月庚戌朔詔百官舉大將衆舉劉益不能用
癸丑飛虎軍二百人奪封邱門出介甲寅以出師銅門
禁乙卯博索間渠於私第東內辰閱官馬殺瘠者以食
丁巳豐紳據徐州圖克坦伊都走宿州推張興行省事
庚申塞京城四門以便守禦壬戌國安入徐州殺張
興推豐紳為元帥以主州事己巳詔贈禦侮中郎將完
顏陳和尚鎮南軍節度使立褒忠廟碑擢參知政事楊

愷罷卒未復修汴城以疫後園戶僧道醫師粥棺者擅
厚利命有司倍征之以助其用甲戌宿州鎮防千戶高
拉格李宣殺節度使赫舍哩阿古父子請行省圖克坦
伊都主帥事伊都不從率將吏西走至殺熟遇大元軍
死之乙亥左丞李暉送曹王與其子全俱還丁丑恒山
公武仙殺士人李汾七月庚辰朔兵刃有火辛巳軍士
搗登聞鼓乞將劉孟癸未尚書右丞延扎舒嚕罷吏部
尚書完顏納新為參知政事甲申飛虎軍士申福蔡元

懷殺北使唐慶等三十餘人于館詔賞其罪和議遂絕
乙酉都人揚言欲殺博索密詔遣衛士護其家丙戌軍
士毀博索別墅薩尼雅布妄殺市人之過其門者以靖
亂丁亥升天子承天門下出內府及兩宮物賜軍士咸
子下令招軍卒卹養民為兵華昌民百二十人赴援乙
未宿州帥重僧努稱國安用降遣近侍直長因世英等
持詔封安用為尧王行京東等路尚書省事賜姓完顏
改名用安新軍有撾登聞鼓者杖殺之乙巳金木人太

陰會于軫翼丙午參知政事完顏思烈恒山公武仙輩
昌總帥完顏呼沙呼率諸將兵自汝州入援以喀齊喀
為樞密使將兵一萬應之命左丞李蹊勸諭出師乃行
八月己酉朔喀齊喀屯杏花營蓋兵五千始進屯中牟
故城庚戌發丁丑五千運糧餉喀齊喀軍辛亥完顏思
烈遇大元兵于京水遂潰武仙退保留山思烈走御寨
中京元帥左監軍任守貞死之喀齊喀棄輜重奔至鄭
門聚兵乃入甲寅免喀齊喀為庶人籍其家以賜軍士

降監軍長樂為符寶郎丁巳釋奠孔子戊午括民間粟
己未籍圖克坦烏登完顏重喜納哈塔和碩家資前儀
封今魏璫上言肇昌師完顏仲德沉殺有遠謀請奉命
往召不報戊辰免府試起復前大司農侯摯為平章政
事進封蕭國公行京都路尚書省事己巳摯帥兵至封
邱將士將潰摯止之乃與衆還汴壬申聽無軍家口出
京甲戌金木星交乙亥賣官及許買進士第丙子詔罷
括粟復以進獻取之丁丑京城民楊興入資授延州判

史戊寅劉仲溫入貲授許州刺史

金史卷十七